

# فواصل 1

سؤال حيران..  
ما بين جَوّايا ووجودي  
بيسأل..  
عن طريق الروح  
وليه ديماً..  
ف عز الحلم..  
بيتردد  
وف الآخر..  
بيجرى..  
ع الوجد والخوف!  
ما بين شطين..  
دموع العين بتجرى بحور  
يا حاضنة النور..  
ف أبعد بر  
يا ساكنة..  
من بعيد ف العمر  
أنا بين اللقا والبعده..  
وحيد..  
بردان ف عز الحر!

## 2

ما بين أقواس..  
سنين  
فيها الأسي حوادث  
وشيء..  
من كل شيء واخذ  
وراسم..  
رقتي دمة..  
مبتخيش..  
رموش عيني!  
ما بين..  
حرفين بينطقم..  
بصوت..  
من روحه متكوّن  
بيتألم..  
ويتغيّر..  
ويتبسّم..  
ويتعلّم!

# 3

ف قلبي النبض..  
متهجّجى..  
الحياة ف صورتك  
حروف الحب..  
من حبّك..  
خجولة  
فقيرة ف التعبير  
حروف وصفك..  
متسماش!  
حروف؟  
ملهاش..  
شبه خالص..  
ف كل حروف..  
لغات الكون!  
يا نور مكنون  
فحضن نجوم  
بتحضن..

ألف شمس  
وشمس..  
كلام الأمس..  
والحاضر  
وأبعد غد..  
مش ممكن..  
تترجم..  
دقة من دقائق..  
هيام قلبي  
أنا ف حبي..  
بشوف الناس  
ف أحلام النهار..  
أطياف..  
تدور مع نور..  
ملا كونك  
وتسعى..  
من صفا روحك..  
لنظرة..  
عطف ف عيونك!

يا رقة..  
بتحضن الرقة  
وتوهبها لحياتي عطور  
بشوف النور..  
ف لون خدك  
وأقول..  
كان فين..  
كلام العشق..  
من قبلك  
وليه الوصف..  
عن حبك..  
مالوش..  
ف معاجم العالم..  
حروف..  
تتهجّي إحساسي!  
يا أنفاسي..  
ما بين العين..

وبين..  
همس الشفايف فين؟  
كلامي زمان ودلوقتي..  
أنا وقتي..  
بقي وقتي  
ومش وقتي؟  
كأني لسه ف طفولتي  
ما عشتش إلا دلوقتي!

## 5

سحرتيني..  
وداب السحر..  
بين..  
دمي..  
وشراييني  
فواصل عمري..  
من قبلك..  
بقت فاصل..  
ما بين..

أيامى من بعدك..  
وبين قريك  
وبين بعدك..  
بحاول..  
اصبّي تفاصيلي..  
من الماضي..  
بقى العادي..  
العيون تقفل..  
على شرود..  
الهوى والشوق  
وحلمي قبل..  
ما بقبله  
بعاهده يشيل..  
على جناحه..  
رسايل حبي لمنامك  
كفاية عليا أكون لحظة  
بترسم طيف ف أحلامك!